

**Ilisimatusarfimmi Ilinniartitsisunut, Perorsaasunut aammalu Isumaginninnermut Siunnersortinut ataatsimut kandidatinnngorniarfissamik Naalakkersuisut pilersitseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut Ilaasortaq Najaaraq Møller, Siumut)

### **Akissuteqaat**

(Meeqqanut, Inuusuttunut Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Aappassaaneerinnineq**

Ataatsimiititaliap peqqissaartumik suliaannik aamma isumaliutissiisummik suliaqarneranut Naalakkersuisut qutsavigaat. Naalakkersuisut maluginiarpaat Ataatsimiititaliap allannguutissatut siunnersuutaa tunngaveqartoq paasissutissanik Naalakkersuisut suliamik siullermeerinninnermi saqqummiussaannik, kiisalu ilisimatitsiffiusumik ataatsimiinnermiit siunersiuinermiillu. Naalakkersuisut sulissutiginiarpaat ilinniartitaanerit sapinngisamik pitsaanerpaamik pilersinneqarnissaat, qanittumillu oqaloqatigiumallugit kommunit kiisalu ilinnialersussat, ilinniartitaanerit taakkua pillugit.

Naalakkersuisut maluginiarpaat Ataatsimiititaliap kissaatigigaa, sulissutigineqassasoq kandidatitut ilinniartitsisunut, perorsaasunut aamma isumaginninnermi siunnersortinut ataatsimut ilinniartitaanermik pilersitsisoqassasoq, suliallu suleqatigiinnikkut Naalakkersuisunit suleqatigiissitaq pilersinneqartoq aqputigalugu ingerlanneqassasut.

Ataatsimiititaliap inassutigaa:

*Ilinniartitsisunut, Perorsaasunut aammalu Isumaginninnermut Siunnersortinut ataatsimut kandidatinnngorniarfissamik Naalakkersuisut pilersitsinissamik suliaqaqqullugit peqquneqarnissaannik Inatsisartut aalajangiiffigisassaattut siunnersuut, tassani suleqatigiissitaq Naalakkersuisunit pilersinneqarsimasoq pilersitsiniarluni suliaqarnermi suleqatigineqassaaq.*

**Naalakkersuisut ilalersinnaavaat ataatsimiititaliap allannguutissatut siunnersuutaa, inassutigalugulu akuersissutigineqassasoq.**